

四庫全書

經部

欽定四庫全書

經部

春秋辨義卷五

詳校官監察御史臣沈孫璉

給事中臣溫常綬覆勘

總校官進士臣繆琪

校對官中書臣徐步雲

謄錄監生臣郭洽怡

欽定四庫全書

春秋辨義卷五

明 卓爾康 撰

莊公

戊子○莊王四年

元年○齊襄五年晉緡十二年衛惠七年黔牟三年蔡

哀二年鄭厲八年子儀元年曹莊九年陳莊七年卒

杞靖十一年宋莊十七年秦武五年楚武四十八年

春王正月

或以不書即位自是魯君不行即位之禮非聖人絀其即位也予謂嗣子繼世即位情有順逆禮有隆殺不同無不行即位禮如重耳謝喪避為後可不稽顙不能不拜黃楚望曰莊公元年不書即位當據公羊傳為正其言曰公何以不言即位春秋君弑子不言即位君弑則子何以不言即位隱之也孰隱隱子也何休曰隱痛是子之禍不忍言即位公羊此義當矣穀梁則曰繼弑君不言即位正也繼弑君不言即位

之為正何也曰先君不以其道終則子不忍即位也
其說雖正然不及公羊蓋據公羊則知是聖人所改
據穀梁則是作史者皆當如此書故知公羊之義為
得胡文定以為世子必誓于王為諸侯內無所承上
不請命擅有其國春秋絀而不書其說太矯激非正
夫莊公為太子蓋已誓于天子天子已知其應立及
薨則太子嗣位而告喪告葬天子使來歸貶此是舊
典應如此及周之衰賄贈錫命之禮即有遲速或至

今闕然嗣子承統必告天子當已在告喪之時決無
不請命擅有其國之理又設令世子嗣位告葬雖未
獲天子之命然如期而葬名正言順奕世相承豈可
以為擅有其國乎惟不書即位當是夫子所削蓋桓
公以去年十二月葬則莊公必用踰年改元之禮夫
子以為父死於外子當隱痛故不書即位此公羊之
義所以為得文定之說失之太過也

三月夫人孫于齊

文姜與弑公魯人責之心不自安故出奔內諱奔故
言遜去年四月公喪夫人必送歸魯魯人責之故于
此三月奔齊非于接練時錄母之變公羊所謂正月
以存君念母以首事者非也不稱姜氏畧之也左氏
曰絕不為親則當存姜氏去夫人或曰蒙上文然去
年書姜氏在正月去此遠矣春秋有善詞焉有厭詞
焉善詞詳厭詞畧心憎是人而不能不舉者不曰夫
己氏則曰是而夫或視楹以代名或指掌以示惡不

勝其忽夷棄置之意焉文姜不具稱亦猶是也陸粲氏曰後此蓋屢書夫人姜氏又書葬我小君文姜既畧之復親之何也臣子辭也春秋于文姜哀姜始終皆以小君之禮書之者亦不沒其實而義自見穀梁子曰夫人之我可以不夫人之乎

連叢子梁人娶後妻後妻殺夫其子又殺之季彥過梁梁相曰此子當以大逆論禮繼母如母是殺母也季彥曰言如母則與親母不等欲以義督之也昔文

姜與弑魯桓春秋去其姜氏傳曰不稱姜氏絕不為親禮也絕不為親則凡人耳且夫手殺重于知情知情猶不得為親則此下手之時母名絕矣方之古義是子宜以非司寇而擅殺當之不得為殺母而論以大逆也梁相從之

夏單伯送王姬

單伯逆王姬一以為送王姬一以為逆王姬據左傳則單伯是天子大夫據二傳則單伯是魯大夫蓋魯

使之逆王姬也左氏親見國史則魯無單伯實是周
命大夫莊十四年單伯會伐宋左氏云齊請師于周
夏單伯會之取成于宋而還又十四年單伯如齊齊
人執單伯左氏云襄仲使告于王請以王寵求昭姬
于齊冬單伯如齊請子叔姬齊人執之載于左氏者
班班可考也

此單伯也一以為周大夫一以為魯大夫言之有故
皆為可據然周疑于魯魯疑于周學者終莫能堅決

也已得三說而豁然王申子曰禮天子使其大夫監于方伯之國國三人魯大夫有單伯費伯夷伯魯有監國三大夫也范氏曰單姓伯字禮諸侯歲貢士于天子天子命之使還其國為大夫者不名陸氏曰諸國大夫王賜之圻內邑為號令歸國如單伯祭仲是也周德雖衰王靈未歇官方舊典尚有一二在則單伯蓋周大夫而監于魯魯大夫而名于周者固與鄭之祭仲陳之女叔一例矣則單伯之疑周疑魯也固

宜

送王姬者主婚雖魯周必有送女之人其以送于齊
送于魯皆單伯也公穀改經文送字為逆以就其說
謬矣

送公穀作逆

秋築王姬之館于外

公羊云天子嫁女于諸侯必使諸侯同姓者主之諸
侯嫁女于大夫必使大夫同姓者主之魯為主久

矣築之于外何也公在諒陰之內齊侯當來親迎不
忍即行嘉禮接賓于廟又不敢明逆王命辭主婚故
築館于外使齊侯從外逆之穀梁云仇讐之人非所
以接婚姻也衰麻非所以接弁冕也魯當是時固當
有此二念而其為之辭則必以制喪未闋故異其禮
云爾王樵氏曰魯自主王姬之外今年會伐衛明年
同狩又明年復會伐衛讐齊之意無幾微見于舉動
烏在接嘉禮之不安而築之外乎其不言齊侯來逆

何也齊侯驕強未必親逆或不書築館于歸既已備載親迎自不必言或不書親迎則仇讐在目如觸眼釘魯人不快或不書此三不書者義俱有之

高忠憲曰主王姬者必自公門出于廟則已尊於寢則已卑為之築節矣築必有常處何以築於外仇讐之人非所以接婚姻也衰麻非所以接弁冕也知其不可故築于外也然有三年之喪天王于義不當使之主有不戴天之讐莊公于義不可為之主築於外

之為宜不若辭而不主之為正也

冬十月乙亥陳侯林卒

高氏曰莊公與桓王同時王名林而公亦名林君臣同名也

王使榮叔來錫桓公命

穀梁云禮有受命無來錫命生不服死追錫之不正甚矣然此命錫于葬後必謚典號冊非爵服之命也
李氏曰錫命公羊注取禮緯說禮禮有九錫一車馬

以代其步二衣服以表其德三樂則以化其民四朱
戶以明其別五納陞以安其體六虎賁以備非常七
弓矢使得專征八鉞鉞使得專伐九秬鬯使之祭祀
皆所以勸善扶不能言命不言服者重命不重財物
周禮典命百里不過九命七十里不過七命五十里
不過五命穀梁注亦引九錫文而疏曰九錫與周禮
九命異何休既引九錫又引九命其意以九錫即九
命也今按大宗伯以九儀之命正邦國之位一命受

職再命受服三命受位四命受器五命受則六命賜
官七命賜國八命作牧九命作伯則與九錫不同矣
舊解九錫之名輿馬大輅戎輅各一玄馬二也衣服
玄衮也樂則軒縣也朱戶所居之室朱其戶也納陛
從中階而升也虎賁三百人也弓矢彤旅之弓矢也
鈇鉞大柯斧賜之專殺也秬鬯秬鬯之酒盛於圭瓚
之中以祭祀也胡氏于文元年傳曰黻冕圭璧因其
終喪入見而賜之車馬衮黻因其歲時來朝而錫之

彤弓旅矢因其敵愾獻功而錫之然參之諸書平王
命晉文侯以鉅鬯弓矢虎賁宰孔賜齊侯受命賞服
大輅龍旂九旒渠門赤旂襄王命晉文亦以大輅之
服戎輅之服彤弓鉞鉞鉅鬯虎賁而已則古者策命
之典亦不過如此何休范甯本得之但其所引出禮
緯及白虎通則漢儒以漢法附會增益之也胡氏取
禮及詩為證而分為三事蓋詩人之詞不過言其大
槩其實有功亦可以賜車馬黻冕也王命士會以黻

冕是矣又考之左傳文元年毛伯錫命注曰諸侯即位天子賜以命圭莊二十七年惠王使召伯廖賜齊侯命不言所命杜氏直謂命為侯伯襄十四年靈王使劉定公賜齊命曰昔伯舅太公右我先王股肱周室師保萬民世祚太師以表東海王室之不壞繫伯舅是賴今余命女環茲率舅氏之典纂乃祖考無忝乃舊敬之哉無廢朕命昭七年衛告喪請命景王使成簡公如衛弔且追命襄公曰叔父陟恪在我先王

之左右以佐事上帝余敢忘高圉亞圉而命晉文之
辭亦有策書以此觀之則錫命有命辭有命物矣又
或止有命辭而無命物亦未可知有命辭有命物者
如後世以璽書褒賞功臣增秩賜金是也止有命辭
者如後世賜手詔褒美是也要之三傳之說皆可通
又曰韋昭國語錫晉文命下注云命服也諸侯七命
冕服七章賜晉惠公下又曰賜瑞其說又不同見文
元年又曰策命晉侯為侯伯下杜注曰九命作伯是

既加以九命之伯又加以九錫之賜則何氏兼引九錫九命亦自有見

王姬歸于齊

齊師遷紀邢鄆郛

熊過氏曰齊欲滅紀故徙民于他邑而取其地不書其地趙子常云分背之非一處也公羊曰遷之者何取之也外取邑不書此何以書自是始滅之也

此書遷之始

邢今青州府臨朐縣古東莞郡今平度州昌邑縣古
北海郡都昌縣部今臨朐連界安丘東南古朱虛

己丑○莊公五年

二年○齊襄六晉緡十三衛惠八黔牟四蔡哀三鄭厲
九子儀二曹莊十陳宣公杵臼元年杞靖十二宋莊
十八卒秦武六楚武四十九

春王二月葬陳莊公

夏公子慶父帥師伐於餘丘

於餘丘公羊曰邾婁之邑也曷為不繫乎邾婁國之
也曷為國之君存焉耳杜謂小國孫明復羅泌路史
以為魯附庸國今鄒縣古南平陽也南界邾瑕以其
與邾通故伐之今不繫邾有二說其一公羊所謂國
之也其一魯附庸國以內詞書也未知孰是若慶父
得國擅兵兩世其說不然蓋國家分國不過百里建
卿制位總以軍名大國三軍即為三卿小國即為二
卿有以公子而不命為卿者矣未有為卿而不成軍

亦未有成軍而不將兵者非如後世天下之大四海之衆樞密本兵總管督衆別握兵權也

熊過氏曰慶父者莊公之庶兄本庶孟宜稱孟不欲先莊公故自稱仲若母弟然公羊遂指為母弟也於發語辭餘丘今兗州府滋陽縣東南界

秋七月齊王姬卒

王姬非內女亦書卒為比之內女故也檀弓曰齊告王姬之喪魯莊公為之大功或曰繇魯嫁故為之服

姊妹之服是其比內女也穀梁曰為之主者卒之也此一事書逆書築館書歸書卒辭繁而不殺何也在不修春秋者魯以喪事主婚築館于外為變之正故左氏曰得禮在修春秋者魯忘父事仇為之委曲詳縟以畢事焉禮愈得而心愈失矣

冬十有二月夫人姜氏會齊侯于禚

趙氏曰姜氏齊侯之惡著矣亦以病公也曰子可制母乎夫死從子通乎其下況于國君君者人神之主

風教之本也不能正家如正國何若莊公者哀痛以
思父誠敬以事母威刑以督下車馬僕從莫不俟命
夫人徒往乎夫人之往也則公威命之不行哀戚之
不至耳

禚公作郛齊地

乙酉宋公馮卒

庚寅○莊王六年

三年○齊襄七晉緡十四衛惠九黔牟五蔡哀四鄭厲

十子儀三曹莊十一陳宣二杞靖十三宋閔公捷元年秦武七楚武五十

春王正月溺會齊師伐衛

左氏云疾之也桓十六年衛惠公奔齊溺會齊師伐衛納惠公也然朔殺兄篡立魯同惡相濟故左氏言疾之公羊云溺吾大夫之未命者是也

夏四月癸未葬宋莊公

五月癸亥葬桓王

左氏緩也王崩至是七年矣穀梁曰郤尸以求諸侯
舉天下而葬一人危不得葬也

秋紀季以鄆入于齊

胡傳春秋之義私逃者必書奔有罪者必加貶今季
不書奔則非竊地不書名則非貶也諸侯兄弟貶則
書名宋辰秦鍼之類是也不貶則書字祭季許叔之
類是也紀季所以不書奔者有紀侯之命矣所以不
書名者天下無道強衆相陵天子不能正方伯不能

伐屈已事齊請後五廟其亦不得已而為之者非其
罪也蘓子由曰紀非齊之敵也天子莫之治諸侯莫
之救紀侯內則不能下齊外則不忍抗齊以殘其民
將棄國而去故以鄆與季使為附庸以無廢先祀故
書曰紀季以鄆入于齊言非叛也季之不名附庸之
君且喜之也

劉氏曰紀季見齊之必將滅已故請先下齊以退敵
兵以安君存國之故析地事仇援存亡繼絕之義使

宗廟血食後嗣復見叔姬歸鄫是也可謂明于權矣
鄫今臨淄縣東界古東安平

冬公次于滑

左傳將會鄭伯謀紀故也鄭伯辭以難

胡傳穀梁子曰次止也有畏也欲救紀而不能也春
秋紀兵伐而書次以次為善救而書次以次為譏次
于滑譏之也魯紀有婚姻之好當恤其患於齊有父
之讐不共戴天苟能救紀抑齊一舉兩善并矣見義

不為春秋之所惡故書公次于滑以譏之也或言夫子意在刺無王命若譏其怯懦則當褒其勇者春秋乃鼓亂之書為此言者誤矣易於謙之六五則曰利用侵伐師之六四則曰左次無咎進退勇怯顧義如何耳豈可專以勇為鼓亂而不與乎

齊為強大必朝夕滅紀而後安魯雖主紀安能明言救援其意尚欲晤商于鄭以為區畫耳胡氏救而書次為譏固不知當日情形若季氏謂滑在魯西南何

為次滑而謀夫謀人者遠近固不必論第曰左氏以
為將會鄭伯謀紀則厲公失國未復方受制于其臣
自救且不暇何暇他謀况魯莊方幼以甥事舅惟齊
是從豈復有謀紀之志乎故滑之次非為紀也季氏
謂滑在衛南鄙其必奉齊命以俟諸侯納朔而不至
者歟然五年之伐衛已張本于此矣夫伐衛去此二
年次滑未必預謀若此還以謀紀為確惟其鄭伯見
辭又畏齊故不敢徑行作此逡巡耳左氏所舉鄭伯

突與儀未可知也據滑地計之若是滑縣應與儀謀若是滑國應與突謀然魯不君忽何況于儀突謀是也

熊氏曰滑今大名府滑縣是杜氏所言陳留襄邑西北地然則是衛南鄙非鄭地矣若滑國則自都費在河南緱氏縣

滑公穀作郎

辛卯○莊王七年

四年○齊襄八晉緡十五衛惠十黔牟六蔡哀五鄭厲
十一子儀四曹莊十二陳宣三杞靖十四宋閔二秦
武八楚武五十一

春王二月夫人姜氏享齊侯于祝丘

高忠憲曰禮姑姊妹已嫁而反兄弟不與同席而坐
况用兩君相見之禮乎

祝丘魯地

享公穀作饗

三月紀伯姬卒

黃正憲氏曰按禮諸侯絕旁暮姑姊妹女子嫁于國
君者尊與已同則變不服之例為之服大功蓋變恩
成于敵體故書其卒適大夫則畧之矣伯姬惠公之
女隱公元年履緌所逆者也婚姻之國實有唇齒輔
車之勢焉桓公庇之而不終莊公畏齊而不救紀亡
而伯姬與之俱亡春秋感慨之意深矣

夏齊侯陳侯鄭伯遇于垂

垂之遇趙子常謂鄭要陳遇齊請存紀社稷然突方
居櫟豈能謀紀高抑崇言齊結陳鄭之懼恐其救紀
夫齊何畏于陳鄭陳鄭又去紀最遠亦何能救紀者
而至于宋衛之間為遇哉此疑鄭突求釋援紀之怨
于齊假陳以為介紹也

蘓子繇曰桓十五年書突出奔蔡忽歸于鄭是年九
月突入于櫟十七年高渠彌弑忽立子亶十八年齊
襄公殺子亶而入則遇于垂者子儀也然則鄭有二

君可乎春秋有一國而二君者鄭突與儀衛衍與剽
是也突衍始終為君子儀君鄭十有四年剽君衛十
有一年皆能君者也故春秋因其實而君之然則孰
與曰皆不與也突之入以篡衍之出以惡儀剽雖國
人所立而突衍在焉非所以為安也故四人者春秋
莫適與也皆不沒其實耳

子常之說則遇垂者為子突蘓王之說則遇垂者為
子儀子細辯之論大勢則厲公強黜內結國外人外邀

隣國後終君鄭似此鄭伯為突論情事子儀自陳入
子亶又為齊所殺則此齊陳之遇又似為儀再推之
突故強點或見齊殺子亶陳入子儀特邀二國以為
乞援二國既不與會姑以遇禮相見少荅其意則此
鄭伯又似為突又再推之陳入子儀自知國小乞齊
之靈共為繫援則此鄭伯又當為儀又再推之以地
之相去論垂曹地近鄭國則此亦似為儀然諸侯始
終不君儀即在本國徒寄空名十四年子儀之弑鄭

人不告喪魯史不書弑則知此垂之遇是突非儀必也若援紀之謀突強而未定儀弱而自守俱無能為者且三傳無明文子常曰謀紀尤無據矣

垂曹地

紀侯大去其國

左傳紀侯不能下齊以與紀季夏紀侯大去其國違齊難也

大字左傳無明文公羊云大者何滅也穀梁云大去

者不遺一人之辭程子曰大名也吳幼清曰紀侯去其國而紀遂亡故名之蘓子繇曰大去者不返之辭也以國與季季奉社稷故不言滅不見迫逐故不言奔雖失地之君而原其行事則周亶父也故賢之而不名公羊曰何以不言滅為齊襄諱也春秋為賢者諱何賢乎襄公復讐也齊哀公享于周紀侯譖之于九世矣世蓋有復九世之仇者乎且襄公非志于復讐者也雖或以是為名春秋從而信之可乎熊氏

曰大去者往年分鄆與季紀國猶在紀入齊為附庸
得自立廟存姑姊妹至是以所都壽光委之而脫身
于外寓則非滅矣又無迫逐不得稱奔君子于是知
紀侯之失國庶幾有辭焉春秋特筆書之憫紀罪齊
也按十二年叔姬歸鄆入齊杜云鄆在東莞劇縣鄭
樵謂遷劇號劬劇夫紀雖去尚能別邑于劇是紀尚
未滅也何得實說紀遂亡而名之乎又二十年降鄆
公穀云紀遺邑蓋紀侯去國二十七年矣而猶有遺

邑是紀尚未滅又一證也若與其不爭而去不與其
不爭而不存則胡氏備矣按紀以鄫入齊不可言滅
既不滅國不當言名則大非名也大去猶言大歸也
熊氏之說是也

鄧元錫氏曰國之存亡天實與立天祚建德有所底
止時之弗逢德遭其凶民之無援大偏小攻則天實
命之謂之何哉故一委命于天紀侯紀季紀叔姬其
人也紀鄫非季有也以入于齊而書字貴其請後五

廟而存姑姊妹也微子之義也諸侯失地名紀侯失地矣書大去其國曰大去明亡也異他國君之孫而去然又不忍其亡以大去書亦大其以爭國為小而去之也太王之德也又不欲以暴齊而加紀焉至叔姬一亡國嫠媵耳紀亡從君迄終死不釋君沒矣魯為姬宗國有來歸之義而不即安也歸于鄫以奉其先之宗祀故紀亡書紀明志不貳于紀也歸鄫書歸明歸不失其正也全宗中仁大去中智遜出斯孫禮

行比禮而叔姬峻志貞心捨命不渝也故亡國如紀
侯三季之仁義存焉以見貴于春秋孟子曰國君死
社稷一道也去之一道也擇而取之可也諸難隣國
不免焉請王命求成不免焉遷邢鄆鄆不免焉則大
去可也或曰與其去不與其去而不存去而冀存則
如勿去且存亡國之所必有也何可冀也曰太王遷
而存何也曰是天所興立也方是時也岐不毛狄不
爭世未黷于兵故全也乃春秋戰國之際邦如碁布

星列各有主也世爭于戰攻不厭也即一成一旅窮
所至蹙之豈有存哉宋閩廣是矣夫國莫慘于滅亡
而有道存焉則天之無不命也人之無不天也即興
廢存亡異而處之一也故以為性命之書充斯義也
樂天安土敦仁能愛而我無與焉

姜廷善曰今兗州府鄒縣東南二十五里嶧山之陽
有紀城地誌以為紀侯遺邑且有紀子墓焉豈即紀
侯避居之地耶

六月乙丑齊侯葬紀伯姬

內女不書葬此何以書齊以告也伯姬之葬予齊侯者曰有禮奪齊侯者曰惡詐予謂皆非也紀為齊同姓既不勝其邪心以取其國矣紀侯固兄弟也伯姬非其伯叔母則其伯叔嫂也葬仇葬敵好義者尚且為之伯姬非齊葬其誰葬齊葬伯姬常事也不當予亦不當奪紀亡本末魯史悉書非第以吾女故也紀自有齊難魯兩世君臣悉心謀畫既不能偏師相援

又不敢號呼控人一段悱惻咨嗟之意真有不可自
明者紀國一時君臣夫婦所處盡善固皆可書而春
秋所為悉書者其亦以我一念無已之至情見于立
詞者耶

秋七月

冬公及齊人狩于禚

此齊人公穀皆以為齊侯也何氏曰以不沒公知為
齊侯也其稱人何諱與讐狩也趙子常曰公羊學者

于此獨得經意然不知會伐外稱人圍郕內稱師皆諱也

劉原父曰齊人者齊之微者也其言公及之非公去南面而下與微者狩也若夫忘親釋怨則豈待今日而後貶乎此說是然則狩指練兵非專謂從禽也

禚公穀作部

壬辰○莊王八年

五年○齊襄九晉緡十六衛惠十一黔牟七蔡哀六鄭

厲十二子儀五曹莊十三陳宣四杞靖十五宋閔三
秦武九楚文王熊貲元年

春王正月

夏夫人姜氏如齊師

秋卿犂來來朝

春秋繁露曰附庸字者方三十里名者方二十里穀
梁傳黎來微國未爵命之君是矣其後數從齊桓以
尊周室王命以為小邾子

邾今滕嶧二縣界是邾公作俛犁作黎

冬公會齊人宋人陳人蔡人伐衛

左氏納惠公也公羊此伐衛何納朔也曷為不言納
衛侯朔辟王也穀梁是齊侯宋公也其曰人何也人
諸侯所以人公也其人公何也逆天王之命也趙子
常曰莊公與仇人接春秋始終諱之併人宋陳蔡者
既為內諱不可復存筆削之迹義與僖二十七年人
楚君自異穀梁是齊侯宋公也此說必有所受但曰

人諸侯以人公逆王命也則非既曰以逆王命貶則
內當沒公不書今四國稱人而內獨書公是使公首
惡也所謂人諸侯以人公亦奇譎非聖筆氣象予謂
公與仇人接者已多無足貶矣其在逆王命乎第為
齊侯宋公是穀梁一人語恐未可據

癸巳○莊王九年

六年○齊襄十晉緡十七衛惠十二黔牟八蔡哀七鄭
厲十三子儀六曹莊十四陳宣五杞靖十六宋閔四

秦武十楚文二

春王正月

公穀作三月

王人子突救衛

王人救衛者存黔牟而拒朔也孔穎達曰稱人從其班稱字有為也何休乃謂王遣子突卒不能救為天下笑故為主諱誤矣陳氏曰救衛無功而後王命不行于天下隱桓之諸侯會盟侵伐徒以定篡弑也衛

州吁之亂會者五國宋督之亂會者四國袁之會伐鄭以立突于是伐衛以立朔也

此書救之始

夏六月衛侯朔入于衛

左傳夏衛侯入放公子黔牟于周殺二公子乃即位
熊過氏曰季明德曰凡已入而復者例當書復衛朔
之入不稱復者陳君舉以為未得國也則衛侯鄭之
再歸其國已得而不稱復不可通矣劉原父以為不

與復也則衛侯衍之歸義非可與而稱復不可通矣
至于魚石樂盈之復入義例皆有不合故胡康侯于
鄭忽復歸之下特發一例曰諸侯失國出奔歸而稱
復則可大夫失位出奔歸而稱復則不可古者諸侯
世國大夫不世官是不以復為紀實之詞而聖人可
以抑揚其間所謂求其說而不得從而為之辭耳朔
之出奔衛人實未立君所謂公子黔牟者必洩職以
之權攝國事而實制于二卿者也夫衛君既未立則

朔位固尚存也豈得同于已絕而復之例哉此其所
以不稱復也五國同伐取俘先還實不成乎納朔也
衛侯朔入于衛宜有衛之辭使朔殺二兄篡衛天王
討當其罪春秋于此必有異文矣衛侯朔固非賢君
然父子相承君國自正二公子擁戴黔牟興心篡奪
因其得罪天子而故與合謀逐朔置君是以齊宋陳
蔡不服而為此舉也予考之三傳合之書法定當以
公穀為正然則新臺諸詩奈何宣姜自宣姜惠公自

惠公不相及也惠公孱自孱當得國自當得國不相
叅也

秋公至自伐衛

螟

冬齊人來歸衛俘

左傳文姜請之也

胡氏曰俘者二傳以為寶按商書稱遂伐三朥俘厥
寶玉則俘者正文也寶者釋辭也言齊歸衛寶則知

四國皆受朔之賂矣春秋特書此事結正諸侯之罪也

俘公穀作寶

甲午○莊王十年

七年○齊襄十一晉緡十八衛惠十三蔡哀八鄭厲十
四子儀七曹莊十五陳宣六杞靖十七宋閔五秦武
十一楚文三

春夫人姜氏會齊侯于防

防魯地

夏四月辛卯夜恒星不見夜中星隕如雨

蘇子繇曰恒星不見夜明也星隕如雨衆也左氏以
為與雨偕公羊以為雨星不及地尺而復按歷代天
文志記衆星同隕皆以為星隕如雨蓋無足怪也

夜穀作昔隕公作實

秋大水無麥苗

黃楚望曰莊七年秋大水無麥苗杜氏曰今五月周

之秋平地出水漂穀熟麥及五稼之苗傳云無麥苗
不害嘉穀也杜氏謂黍稷尚可更種故曰不害嘉穀
澤謂苗者五穀在田之通稱孟子云宋人閔其苗之
不長又曰惡莠恐其亂苗漢書立苗欲踈唐史稱青
苗皆謂此也今此書無麥苗記異耳一穀不登不書
而今書無麥者以舊穀既沒新穀未登此時麥為民
食之最重故特書也建午之月當是水與雨會故麥
熟未得斂而四月已種之穀成苗亦為水所漂春秋

二百四十二年惟此年一見所以為異此年不書饑者蓋水亦旋退更種他穀耳

冬夫人姜氏會齊侯于穀

穀今山東東阿縣南十二里有穀城

乙未○莊王十一年

八年○齊襄十二弑晉緡十九衛惠十四蔡哀九鄭厲十五子儀八曹莊十六陳宣七杞靖十八宋閔六蔡武十二楚文四

春王正月師次于郎以俟陳人蔡人甲午治兵夏師及齊師圍郕郕降于齊師秋師還

郕為文昭與周公為兄弟魯同禰之國也壤地同而有欲于齊牽魯以侵之魯欲違齊而反兵則不敢欲從齊與操戈又不忍故師次于郎徘徊不進而甲午治兵故為陳鞠師旅整比戎行以濡滯其行雖同齊圍郕而曰郕降齊師則必有緩兵徐戰之法以致郕自降非加兵毒死逼郕于險矣秋師還味此二字有

不事戰鬪善師而還之意當時魯人以彊國之令黽
勉從師夫子前後所書二十餘字而一段夷猶悱惻
委婉周旋之意俱可想見據傳載郈降于齊師仲慶
父請伐齊師公曰不可我實不德齊師何罪則公在
行矣不書公諱之也自春至秋已歷三時公當書至
既諱公自不可書公至而以師還識之書至自在其
中矣書法曲盡如此其化工耶或曰此旨鑒空子何
以得之予曰于諱公及郈伯來奔以見其實于師次

于郎以得其似于書法之委婉以會其神

治公作祠郎公作成

冬十有一月癸未齊無知弑其君諸兒

左傳齊侯使連稱管至父戍葵丘及瓜而代弗許故
謀作亂僖公之母弟曰夷仲年生公孫無知有寵于
僖公襄公絀之二人因之以作亂冬十二月齊侯田
于具丘見大豕曰公子彭生也公懼墮于車傷足喪
屨反誅屨于徒人費鞭之見血走出遇賊于門費請

先入伏公而出鬪死于門中石之紛如死于階下遂入殺孟陽于牀見公之足于戶下遂弑之

趙氏曰穀梁云大夫弑其君以國氏者嫌也弑而代之也按例不命之卿例不書氏既不書氏自然以名連國蘓子繇曰不稱公孫將為君也凡弑君稱君君無道也然春秋所書無道而稱臣者六齊諸兒雖無道而無知以其私弑之故稱無知晉夷臯楚虔雖無道而趙盾公子比疑于無罪故稱盾及比陳平國蔡固齊

光雖無道徵舒太子般崔杼之惡甚于君故稱徵舒
太子般崔杼言各有所當不必同也

丙申○莊王十二年

九年○齊桓公小白元年晉緡二十衛惠十五蔡哀十
鄭厲十六子儀九曹莊十七陳宣八杞靖十九宋閔
七秦武十三楚文五

春齊人殺無知

左傳初公孫無知虐于雍廩春雍廩殺無知穀梁傳

稱人以殺殺有罪也據左氏似賊繇一人殺梁則名
繫討罪義俱未盡蓋無知弑君人所共忿雍廩一人
借公濟私書齊人者國人皆欲殺之也

春秋書稱公子曰公子大夫曰大夫公子大夫曰公
子大夫在父曰公子在兄曰弟始而疑于為君則名
之齊弟曰年鄭弟曰語本國而無族者隱曰俠桓曰
柔他國而無族者楚曰椒吳曰札率其恒稱義無褒
貶此一定之法也說者見隱四之衛人殺州吁于濮

莊九之齊人殺無知討賊止此二人二討皆無其族
以為有意削之不知二人實未賜族也州吁嬖子有
寵疑于為君安遽賜族無知為公孫夷仲年之子仲
年見寵僖公桓三年齊侯使其弟年來聘尚以弟稱
則年且未稱公子無知安得輒稱公孫故曰二人實
未賜族也然則桓六之蔡人殺陳佗宣十一之楚人
殺陳夏徵舒昭四之楚人執齊慶封三人何以去族
三人皆見討于他國者也見討于他國以國氏足矣

奚煩稱為至如非弑逆而去族文十四之公孫敖卒
于齊襄二十三之晉人殺欒盈三十之鄭人殺良霄
敖久在外盈自外入霄已在逃皆位絕也非我之大
夫削之也成十五之宋殺其大夫山左傳曰蕩澤弱
公室殺公子肥書曰宋殺其大夫山言背其族也本
自背族故去其族此春秋之特筆也

公及齊大夫盟于訒

左氏齊無君也大夫不名衆辭也盟納子糾也公羊

以為諱與大夫盟何說焉

皖公穀作暨孫明復曰齊地在今嶧縣東八十里

夏公伐齊納子糾

公穀無子字

齊小白入于齊

糾與小白俱庶子孰為兄孰為弟未可知也左氏無明文公穀及二傳注則子糾是兄桓公是弟程子以薄昭之言證桓公為兄而荀卿嘗謂桓公殺兄以爭

國則二人之為兄弟未有確然者也然國君之子以貴賤論貴賤之法以班論子糾之母魯女小白之母衛女魯在衛上班故貴也書曰齊小白入于齊者小白未經見故繫以齊非時竊入故書以入直舉之辭穀梁曰惡之非也趙氏曰入齊與納糾二事故更端而繫之齊亦非也公伐齊納糾不書齊糾者何也蒙上伐齊之文故不復再書齊也非以當立不立為義也突歸于鄭與小白入于齊同公羊曰歸者出入無

惡入者出入惡而突曰歸小白曰入者則公羊之說
非也宋人執祭仲已與之盟立突矣業有奉焉故曰
歸魯方納糾而桓公自莒先入出其不意故曰入曰
歸則鄭自其家矣不必書鄭曰入則各國皆可入也
故必曰齊小白不稱公子于時不必稱公子也

趙子常曰凡嗣君未踰年稱子者以其即柩前之位
也子糾為魯所納未入國而小白已自莒先入立莒
襄公矣戰敗魯師乃來脇殺子糾子糾未嘗一日立

在喪之位乃得稱子何也凡爭國公子或稱納或稱歸或入或出皆去屬不以正不正若糾與捷菑突忽羈赤小白陽生之類皆是則史固不得異文何獨于糾之納與殺而以嗣君在喪之號稱之此春秋特筆也按史記子糾母魯女也小白母衛女也魯女班當在衛女上則糾貴應立然以才則小白賢以黨則小白有國高為內主論其事則子糾見殺而小白成一匡天下之功苟後世但以小白為賢為有功而不知

糾貴之應立則自賢者必醜正恃功者可奪嫡斯有
國者禍亂之原也春秋正誼不謀利明道不計功是
故于納糾稱子明其應立以別于外納不正而後書
者則糾與小白正不正之分不辨而明矣二傳皆作
伐齊納糾孔穎達曰今左氏定本糾上有子字蓋唐
初學者較定春秋古經以正二傳之失

黃先生澤曰宮闈之制若非班序貴賤之分素定則
亦嘗為亂階故何休立子之制說春秋者決不可廢

也蓋古人立子論適不論年縱不是適亦須母貴賤如晉人欲立長君選擇羣公子亦先論其母今試立例以推之謂如齊襄公是嫡長嗣位子糾是齊僖右媵之子桓公却非兩媵之數乃是衆妾之子則桓公是篡若襄公是右媵或左媵之子而與子糾同母桓母却是衆妾則桓公亦是篡若子糾母是右媵桓母是左媵子糾于次亦應立若子糾母是夫人嫡姪桓母却是兩媵嫡姪則子糾亦應立今更推未盡之說

謂如公子遂生稱公子遂死稱仲遂古人名字似此者不一用此例之則公子糾生則以魯君故單稱糾死稱子糾者是閔之而稱子也閔之而稱子亦所以見桓公不當殺糾是忍于賊害其同氣又設令子糾是弟則以諸侯之制言之兄殺弟而弟乃是應立之子則自應坐篡奪之罪今止以死書字例言之則糾之死是聖人所閔殺糾者自應有罪蓋因爭國而殺縱不是篡亦是奪或問何以分篡奪曰貴賤相去遠

而賤者乃立則是篡二傳謂桓公篡是也貴賤相去
不遠或兩皆可立而彊有力者得之則是奪伊川謂
桓公以兄殺弟亦其類也所謂兩皆可立者謂子糾
若是姪之子而年幼桓公是娣之子而年長則二人
必爭立勢無兩全王道修明之時自應聽命于天子
天子既不能治諸侯則強者必立弱者必死雖王制
必行而公義裁之豈得無所曲直設令子糾立而殺
桓公其罪亦然故用伊川之說推之桓公終不免罪

在王法所當黜若以二傳推之則子糾長而責桓公
是篡無他說也明者于此詳而察之而又有所悟焉
則聖人書法始明而論語召忽管仲之疑釋然矣
秋七月丁酉葬齊襄公

八月庚申及齊師戰于乾時我師敗績

時水名在今樂安縣界支流旱則涸故曰乾時

九月齊人取子糾殺之

左氏言公喪戎路傳乘而歸公實在行今書及齊師

不言公以公敗諱之也又曰蒙上公伐齊之文也雖然若此戰為復仇討賊之舉即公敗亦必重書公伐齊以識欣喜慷慨之辭與沙隨之不得見平丘之不得與爭榮矣必不以常事例也胡氏曰能與仇戰雖敗亦榮以敗為榮似非正義黃楚望曰王師尚不諱敗績魯諸侯也敗績亦安得不書


召忽之死子路子貢責備甚至家語曰子糾未成為君召忽未成為臣此二語記自夫子足為千古定斷

豈二子未之聞耶黃楚望曰夫子不責管仲以死者
盖公子無為君之道師傅先君所託不可純以臣禮
律之有患難則相與周旋既已宣力效勞竭盡其節
而偶脫虎口者則亦在所可恕如管仲是也得夫子
之意矣

冬浚洙

姜廷善曰水經註曰洙水出盖縣西北臨樂山西經
新泰縣西南流于卞城至魯東北流經孔里此謂洙

泗之間也又曰北為洙濟南則泗水二水交于魯城
東北十七里自城北南經魯城西南流而東南入淮
今按蓋與新泰魯之北鄙近齊者也



春秋辯義卷五

欽定四庫全書

經部
春秋辨義卷六

詳校官監察御史_臣沈孫璉

給事中_臣溫常綬覆勘

總校官進士_臣繆琪

校對官中書_臣徐步雲

謄錄監生_臣郭洽怡

欽定四庫全書

春秋辯義卷六

明 卓爾康 撰

莊公三

丁酉○陸王十三年

十年○齊桓二晉緡二十一衛惠十六蔡哀十一鄭厲
十七子儀十曹莊十八陳宣九杞靖二十宋閔八秦
武十四楚文六

春王正月公敗齊師于長勺

經不書齊伐魯公既敗齊又為魯地則齊之伐魯不言可知也

黃楚望曰胡子言齊師伐魯經不書伐責魯也詐戰曰敗兵刃相接以詐謀取勝故書魯為主以責之澤謂桓公死于齊莊公不能復讐及讐惡貫盈而死于弑國內無主而僖公之子糾逃難于魯魯納之又不能集事乾時之敗狼狽而歸鮑叔帥師來脇殺子糾譎取管仲當是時魯幾于不能國矣公若不敗齊師

于長勺敗宋師于乘丘又敗宋師于鄆亦何以立國
君子于此當恕人之情抑彊扶弱豈得更復責魯故
知立論不可失之太過

二月公侵宋

宋閔以莊二年嗣立未嘗通魯惟五年從齊伐衛故
趙子常言侵宋所以撓齊也灌甫曰魯夙與宿盟宋
疾宿故侵宋以釋宿圍觀郎之師公與同行二說得
之矣

此書侵之始

三月宋人遷宿

杜氏曰宋強遷之而取其地故文異于邢遷熊氏曰
此遷國之始杜氏謂無益者則北近齊境南遠于宋
矣高抑崇曰宿介于宋魯之間屬于宋而親魯宋人
以為貳于魯而遷之是也自是宿不復見蓋亦亡矣
宿在今宿遷
此書遷國之始

夏六月齊師宋師次于郎公敗宋師于乘丘

次者止舍之名徘徊而次觀望而次審度而次隨其事而義見救以為譏戰以為善未必確論齊以長勺之敗邀宋報復既入魯地未敢深進此是行兵常法趙氏以為伯圖難集齊次郎楚次厥貉難之也外次不書必有闕天下之故而後書此等議論不知從何處來亦駭矣

熊過氏曰乘丘今在曹縣界內古濟陰乘丘鄭漁仲

云卽在單州魚臺縣蓋宋至此魯伺其分兵將歸誘而取之則乘丘宜在今曹州近單父之地師古指泰山乘丘為言漁仲因合蛇丘為一皆悞

秋九月荆敗蔡師于莘以蔡侯獻舞歸

楚方猾夏春秋惡之不言執者非伯討也不言獲者不與楚人之獲蔡侯也熊氏以為非獲行陳故不言獲拘矣蔡侯何以名留楚九年而死不復國也滕子嬰齊戎蠻子赤皆不復國者也胡氏書名為其服為

臣虜故絕之固不害教實不然也以夔子無罪故不名獻舞又何罪乎至蘓子繇曰凡獲諸侯不言獲而言以歸尊之也又何說焉

王樵氏曰此年荆敗蔡師與十四年荆入蔡自是以內外消長之大勢而書蔡最近楚楚圖北方蔡必首受禍是時齊桓方圖伯未集而荆人之勢已如此矣左氏瑣瑣記一息媯之事假令其有亦豈足書哉

趙子常曰杜氏以蔡季獻舞為一人何氏桓十七年

公羊傳注曰蔡侯封人無子季次當立封人欲立獻舞而疾害季季辟之陳封人死歸反奔喪卒無怨心以爲二人也然杜氏不從者史記蔡世家但言桓侯卒弟哀侯獻舞立獻舞爲桓侯弟則季爲獻舞字以予臆之季決非獻舞也

此書荆猾夏之始

荊州名楚始封以爲國至成王顓改稱楚

莘在今裕州莘縣

舞榭作武

冬十月齊師滅譚譚子奔莒

譚子爵國今濟南歷城縣東界七十里譚城是古平陵其地處齊西畧約三百里是齊所欲得也桓公再不得志于魯務廣土衆民姑為攻瑕之策以立根本此圖伯之規模也譚子不名未通也啖氏書名以著其罪曲矣

李氏曰莊之十年其王靈伯業消長之大會乎齊桓

方謀魯以圖伯于東而荆亦執蔡以爭強于南魯蔡皆文昭之親而所遇若此春秋豈無意乎其不知者以為伯事成而中夏盛其知者以為王道消而外裔長也故執君之禍滅國之禍皆始于此年天下無王齊為之天下無中國楚為之也

此滅國之始

戊戌○莊王十四年

十有一年○齊桓三晉緡二十二衛惠十七蔡哀十二

鄭厲十八子儀十一曹莊十九陳宣十杞靖二十一
宋閔九秦武十五楚文七

春王正月

夏五月戊寅公敗宋師于鄆

熊過氏曰鄆本齊所遷紀邑齊宋嘗合兵次郎而宋
敗乘丘故今將復合而兵在鄆杜氏以鄆為魯邑非
也

秋宋大水

四國同災許人不弔君子是以知許之先亡也魯宋
方爭兵不廢弔恤禮也魯弔宋故書且宋災當記也
冬王姬歸于齊

左氏冬齊侯來逆共姬則齊侯親迎可知何以不書
此時魯與齊構恩禮自薄此年魯主王姬惟書歸齊
一條以識魯主之禮而已不悉書也與莊元年異矣
胡傳按周制王姬嫁于諸侯車服不繫其夫下王后
一等禮亦隆矣春秋書王姬下嫁曷為與列國之女

同辭而不異乎曰陽倡而陰和夫先而婦從天理也
舜為匹夫妻帝二女而其書曰嬪于虞西周王姬嫁
于齊侯亦執婦道成肅雍之德自秦而後尊君抑臣
至謂列侯尚公主使男事女夫屈于婦逆陰陽之位
故王陽條奏世務指此為失而長樂王回亦以其弊
至父母不敢畜其子舅姑不敢畜其婦使人倫悖於
上風俗壞于下又豈所以為治也其流至此然後知
春秋書王姬侯女同詞而不異垂訓大矣

初學記周末以天子嫁女于諸侯使諸侯同姓者主之始謂之公主秦因之漢制帝女為公主姊妹為長公主諸王女為翁主

汪氏曰後世公主出嫁無王姬執婦道之風莫不庸奴其夫雖尚主者極有才名而勢屈于崇貴吞悲茹氣無所逃訴故晉人有無事取官府之說至六朝其失尤甚江敦尚臨海公主讓婚表有云制勒甚於僕隸則其敝可知矣春秋書王姬之歸與詩相表裏實

萬世之法也

己亥○莊王十五年崩

莊王崩當莊公之十二年僖王崩當莊公之十七年
莊僖固庸主不足令魯周不告魯亦不往崩葬自不
書頃王不書左氏明言周公閱王孫蘓爭政史記亦
言周頃王崩公卿爭權故不赴又不待辯矣

十有二年○齊桓四晉緡二十三衛惠十八蔡哀十三
鄭厲十九子儀十二曹莊二十陳宣十一杞靖二十

二宋閔十弑秦武十六楚文八

春王三月

紀叔姬歸于鄫

紀侯已卒叔姬以宗廟在鄫歸奉其祀魯人高其節
義恩禮有加是故其卒其葬春秋悉書使與衛之共
姜同垂不朽亦足榮矣惟叔姬歸鄫一事足風千古
故先書叔姬之歸以本之惟書叔姬故于伯姬之歸
卒亦詳不然魯女之嫁于諸侯多矣何獨伯姬乎詩

曰孝子不匱永錫爾類叔姬之謂也余于是而又見紀侯去國太王之養人也紀侯入齊微子之存祀也叔姬歸鄫共姜之矢志也不幸亡國而危之命變之正庶幾不失其道于紀一時見其盛焉

汪氏曰叔姬雖伯姬之娣然諸侯夫人既卒則次妃攝治內事故叔姬雖媵妾當奉紀祭祀

三國志魏曹爽傳注夏侯文寧女名令女妻爽弟文叔文叔蚤死家欲嫁之以刀截其兩耳居止常依爽

與誅曹氏盡死文寧以曹氏無遺類冀其意沮使人
風之令女以刀斷鼻或曰夫家夷滅已盡守此欲誰
為哉令女曰仁者不以盛衰改節義者不以存亡易
心曹氏全盛之時尚欲保終況今衰亡何忍棄之禽
獸之行吾豈為乎

汪氏曰或謂叔姬歸于叔非其所歸亂也夫叔姬歸
于鄫鄫乃紀五廟所在叔姬之歸以奉祭祀而非歸
于紀季也夏侯令女之依與叔姬正同豈可亦責

之依其伯乎春秋書內女惟紀叔姬宋伯姬錄本末
甚詳非賢而得若是乎

夏四月

秋八月甲午宋萬弑其君捷及其大夫仇牧

仇牧死而得書與孔父同孔父義形于色仇牧不畏
彊禦賢之也太宰督與仇同死官位崇于牧操國重
于牧削而不得書身有罪也當時督之見殺告策必
先于牧削而不書夫子特筆以是知惠伯死子惡以

無君命而不書召忽死子糾以同匹夫而不書皆此志也

捷公作接

冬十月宋萬出奔陳

宋萬奔陳賂陳得萬而醢之受賂者固有罪非宋之罪也苟得賊行誅信大義以快人心可矣其得賊之法安足問焉胡氏以為不成討賊故不書討賊者非也

春秋弑君之賊而本國討得其正者莫如隱四年之
衛人殺州吁于濮莊九年之齊人殺無知他國討得
其正者莫如宣十一年之楚人殺陳夏徵舒昭四年
之楚子執齊慶封殺之伯國討得其正者莫如成十
五年之晉侯執曹伯終春秋不過此四五事而已春
秋自莊九年書齊人殺無知後十二年宋萬弑君止
書奔陳而不正其殺者以後弑君之賊俱不討無可
書也何也春秋弑逆踵接齊桓之伯尚不能討魯宋

之逆取賂而還况于他國以至為臣伐君庇臣逐主
與春秋相始終夫子不勝悲不勝痛故自州吁無知
以外絕不書即里克甯喜二殺疑于討賊者亦不以
討賊書以為三綱絕五倫斃舉世盡臣弑君子弑父
者而吾從何處置筆也夷狄之有君而發憤于楚特
于楚人殺夏徵舒執慶封惓惓焉即徵舒為入陳之
事不可不書乃慶封已逃在吳楚子伐吳原非追討
舊惡可以不書而特書之聖人之情見乎詞矣

姜廷善曰陳人始不以為賊而納之後又因以為利而始殺之是其黨賊而失刑也故書萬出奔陳而不書陳人殺萬以罪陳

庚子○僖王元年

十有三年○齊桓五晉緡二十四衛惠十九蔡哀十四鄭厲二十子儀十三曹莊二十一陳宣十二杞靖二十三卒宋桓公御說元年秦武十七楚文九○周莊王十三年崩子僖王十三年立經不書崩葬

春齊侯宋人陳人蔡人邾人會于北杏

左傳會于北杏以平宋亂遂人不至穀梁傳是齊侯宋公也

齊桓公糾合四國大有謀焉陳蔡與宋近合陳宋漸可入中國矣合蔡所以間楚也蔡之終不至者為楚迫也邾東方之國齊之後也魯望國鄰國是大援也合邾而亦可以多助矣合魯而齊無內虞可以出而縱橫天下矣鄭亂先宋齊何不平鄭曰桓公方為宋

謀未暇及也

四國稱人胡氏曰諸侯自相推戴為盟主是無君矣
稱人以誅始亂是逆知齊桓之伯而先抑之也或曰
桓公始平宋亂遂得諸侯言衆與之也是逆知齊桓
之伯而先獎之也皆非也以宋人為宋公是穀梁一
人語與莊五納朔同然如其稱人亦自有說蓋去年
冬十月宋萬奔陳是時蕭叔大心纔立御說為君而
今年春齊桓即為此會也相隔僅兩月餘耳萬罪方

討宋君未與會北杏之舉齊固曰吾以平宋耳御說
方將仰鼻息于齊何敢哆然行公禮以與齊亢乎故
稱人宋稱人則三國自不得不人矣况邾為附庸可
以人蔡侯獻舞十年為楚所執而不歸蔡未立君可
以人獨所難者陳耳然陳蔡同為小國人陳與宋等
亦無情焉三人從二人人之宜也况陳蔡邾傳皆不
言其君人之宜也

廬陵李氏曰春秋始伯之書有三北杏獨書齊侯曹

南獨書宋公城濮獨書晉侯是也然胡氏止于北杏
發于齊侯之說陳氏兼及城濮至于曹南二家皆不
予之盖以鹿上復人宋則非始伯之詞矣然則曹南
予宋亦可又曰此為齊桓伯事之始桓公自莒及齊
得管仲于鮑叔而任之首懲襄公田獵畢弋之戒於
是管仲得以盡行其術制國以為二十一鄉工商之
鄉六士鄉十五與國高各帥五鄉焉作內政而寄軍
令興鹽筴以盡海王之利春蒐秋狩有士三萬人以

方行天下而又以三選擇賢始于鄉長之推繼于官
長之選復親自資相於是民皆勉于為善相地而衰
征山澤各致其時於是民各安其居正封疆重聘幣
號召天下之遊士以犀甲贖罪擇其淫亂者而先征
之反棠潛于魯使為南伐之主反臺原漆里于衛使
為西伐之主反柴夫吠狗于燕使為北伐之主故齊
國之境南至陶陰西至濟北北至于河東至于紀鄆
有革車八百乘即位數年東南多亂者萊莒徐夷吳

越一戰帥服三十餘國是雖伯者之事然規模次第亦有自矣左氏于桓公事多畧故具于此內政之法十五鄉出三萬人五家為軌軌有長十軌為里里有司四里為連連有長十連為鄉鄉有良人五鄉一帥故萬人為一軍帥帥之比之周制萬二千五百人為軍者誠簡便矣故曰桓文節制之師

北杏齊地

齊侯穀作齊人

夏六月齊人滅遂

北杏之會遂人不至齊人滅而戍之齊桓立二年而滅譚五年而滅遂譚之於齊也出而不禮入而不賀滅之以示威遂人不與北杏無救患恤災之義則仗義執言矣此齊桓成伯之始圖也

高忠憲曰將卑師少稱人自此至閔二年遷陽凡齊兵皆稱人見其兵貴精而不貴多也

遂今濟南府肥城縣南界古濟北蛇丘

秋七月

冬公會齊侯盟于柯

左傳始及齊平也

李濂氏曰當時修伯非得魯則不足為重故如公羊所稱曹子之事捐小利用伯術以收魯容或有之魯亦知齊欲以信求諸侯故因盟以求地而公羊遂夸大之爾蓋魯自長勺乘丘之勝國勢稍振齊不敢以譚遂之術待魯而多方以求之屈已于歸田遷延于

姻好示威于三國耀武于戎捷而魯自是不敢有從違之心矣九合之盛亦原于此

蘓子繇曰公羊記曹沫手劫桓公以求汶陽之田管仲許之要盟可犯而桓公不欺曹子可讐而桓公不怨桓公之信由此著於天下予以為此春秋之後好事者之浮說而非其實也齊魯之怨不在桓公曹沫無以發其怒一也使曹沫誠以劫得盟如華元子反則春秋要盟不書楚宋之盟書曰宋人及楚人平而

不書盟今書公會齊侯盟于柯二也故公羊不足信也魯仲連稱曹子為魯將三戰三北失地五百里及桓公會諸侯曹子以一劒之任折桓公之心於壇坫之上三戰所亡一朝而復按長勺之戰莊公始用曹沫以敗齊自是魯未嘗敗安得所謂三戰三北而兵劫桓公求侵地者乎故仲連亦不足信也

入春秋楚滅漢陽諸姬在齊桓未霸前晉滅耿霍魏在桓伯後告命皆不及于魯故史不書而齊桓滅譚

滅遂在經為滅國之始陳氏謂不書晉楚滅國蔽罪于伯主其失與二傳均矣

柯齊邑在今東平州東阿縣魯北境

左傳宋人背北杏之會

辛丑○僖王二年

十有四年○齊桓六晉緡二十五衛惠二十蔡哀十五鄭厲二十一子儀十四弑曹莊二十二陳宣十三杞共公元年宋桓二秦武十八楚文十

春齊人陳人曹人伐宋

左傳諸侯伐宋齊請師于周

國語伐備鐘鼓聲其罪也襲侵無聲為蹇事也

夏單伯會伐宋

左傳夏單伯會之取成于宋而還

趙氏曰單伯周大夫也齊桓公所仗以圖諸侯者宋也宋閔公被弑齊桓為北杏之會以平宋而宋首背之豈以桓非受命之伯故諸侯有未安其令者乎于

是齊請師于天子以伐宋而單伯會之假王命以合諸侯也陳氏傳曰春秋之初王室猶甚威重也衛之定州吁也紀之求成於齊也皆欲假寵于王齊桓之興亦必請王師而後專伐自伯者之令行天下諸侯不復知有王矣

或曰是伐宋者齊侯陳侯曹伯也諸家以為將卑師少且以單伯為魯臣故其說支離如此然據左傳諸侯伐宋之語則以事統于君故曰諸侯不必其君親

在乃稱諸侯也熊氏曰苟非其君親之即身在行間
不必目君成襄以前書法自是如此故此三國君在
不在未可知也

六月傳瑕殺鄭子及其二子而納厲公厲公入殺傳
瑕

子儀在經十四年而春秋不書弑君鄭固不告諸侯
亦不以子儀為君也

秋七月荆入蔡

北杏之會蔡已從齊但齊桓霸業初基威勢未盛故
楚恃其強復入蔡

李廉氏曰蔡為周室宗盟之長近于楚而嘗受楚禍
中國之力有不及焉故自北杏之後齊之盟會蔡不
復與矣蔡之始錄于經則會鄧以懼楚終錄于經則
遷州來以避楚楚之始見于經曰敗蔡終錄于經曰
圍蔡齊晉之伯其極盛則侵蔡以伐楚其極衰則會
召陵以救蔡而不能終于柘舉之戰吳操中國之權

又以蔡故焉原一蔡之始終而中國消長之形荆楚
強弱之變皆可見矣

冬單伯會齊侯宋公衛侯鄭伯于鄆

左傳宋服故也

衛朔入國不通諸侯者九年鄭突自遇垂不通諸侯
者十一年今皆不敢不至宋服故也齊伯畧定矣

齊侯于是始命以伯于何見之班序上下以國大小
為次征伐則以主兵為先今鄆之會班序之禮也齊

先于宋是以知命齊以伯也

趙子常曰凡王入以內辭書之二傳不知史法誤以單伯為魯大夫故元年送王姬改送為逆胡氏承其誤遂使桓公請命天子之意不彰呂大圭氏曰單伯周之世族周有單襄公單簡公諸侯大夫無稱伯者如毛伯凡伯召伯皆王朝卿蓋周有單姓魯無單姓經傳固可攷也

王臣于諸侯會不殊而盟殊盟于小臣不殊而大臣

殊莊公十四年單伯會齊侯宋公衛侯鄭伯于鄆此
會不殊也僖八年洮之盟王人與盟此盟與小臣不
殊也僖九年葵丘之會宰周公不與盟此大臣殊也
齊桓尊周立法必無僭越之事此三者會盟王臣之
定例至襄公二年單子與晉宋列國盟于雞澤昭十
三年劉子與齊列國同盟于平丘則王大臣爭相執
耳矣此世道之變也

鄆衛地今濮州

壬寅○僖王三年

十有五年○齊桓七晉緡二十六衛惠二十一蔡哀十六鄭厲二十二曹莊二十三陳宣十四杞共二宋桓三秦武十九楚文十一

春齊侯宋公陳侯衛侯鄭伯會于鄆

左傳春復會焉齊始霸也其復會何單伯既還桓公始自以方伯之禮會諸侯且有陳也

夏夫人姜氏如齊

趙子常曰以國事行也或曰求婦也鄆之會莊公不
預文姜如齊疑若為之解歟許氏張氏皆主此說

秋宋人齊人邾人伐郕

左傳秋諸侯為宋伐郕

杜氏曰郕附庸屬宋而叛故齊桓為之伐郕熊氏曰
郕魯附庸之國宋從齊而魯不會鄆故齊助宋爭郕
以抑之也其後至僖公請王進郕為小邾子而仍隸
魯焉則以僖之睦也而霸者之心見矣

杜氏曰班序上下以國大小為次征伐則以主兵為
先二君相敵則先齊侯成伯也非君而人自是以爵
為序

鄭公作兜

鄭人侵宋

左傳諸侯以宋伐鄭鄭人間之而侵宋

胡傳侵宋之義三傳不同左氏曰有鐘鼓曰伐無鐘
鼓曰侵先儒或非其說以為聲罪致討曰伐無名行

師曰侵未有以易之者也然考諸五經皆稱侵伐在
易謙之六五曰利用侵伐征不服也書之泰誓曰我
武惟揚侵于之疆詩之皇矣曰依其在京侵自阮疆
周官大司馬以九伐之法正邦國而曰賊害賢民則
伐之負固不服則侵之而以為無名行師可乎然則
或曰侵或曰伐聲罪致討曰伐潛師掠境曰侵聲罪
者鳴鐘擊鼓整衆而行兵法所謂正也潛師者銜枚
臥鼓出人不意兵法所謂奇也

王樵氏曰鄭不誠服齊背二鄆之會而侵宋桓公若能聲突篡奪之罪而廢之擇立莊公之子豈不為伯業之光哉不此之顧二鄆之會既列諸同好及其反覆三國伐之又以宋故為詞其義淺矣

冬十月

癸卯○僖王四年

十有六年○齊桓八晉緡二十七滅武公稱三十八年衛惠二十二蔡哀十七鄭厲二十三曹莊二十四陳

宣十五杞共三宋桓四秦武二十楚文十二

春王正月

夏宋人齊人衛人伐鄭

左傳諸侯伐鄭宋故也

熊過氏曰宋主兵故先齊許翰曰中國諸侯既為之服鄭又為之服鄭宋盖自是與齊為一宋親而中國諸侯定矣

此南北爭鄭之始

秋荊伐鄭

左傳鄭伯自櫟入緩告于楚楚伐鄭及櫟為不禮故也

齊楚伐鄭于是始王樵氏曰齊方圖霸楚亦浸強北侵不已陳蔡鄭許適當其衝而鄭尤要領之國中國得鄭則可以拒楚楚得鄭則可以窺中國故鄭者伯與楚之所必爭也自是鄭被兵於齊於晉者三十有九於楚者二十春秋備書以識其時之盛衰焉

冬十有二月會齊侯宋公陳侯衛侯鄭伯許男滑伯滕子同盟于幽

左氏鄭成也趙氏不言公諱與讐同盟也敵惠敵怨不在後嗣非也如其為仇何不于柯之盟諱之也程氏曰惡失信也此緣後受鄭詹生義亦非也杜氏以為微者齊為大國桓又新貴柯盟在通口血未乾亡國諸侯儼然在焉魯君何敢以微者往竊疑必是脫文及檢公羊本條原有公字信矣齊自北杏以後諸

侯之心猶未一也故雖屢會而無盟至是以鄭成之故九合諸侯同心尊周而外楚然猶未敢弔主盟之權故曰同盟至僖二年盟于貫齊始為盟主不復書同矣

趙氏曰公既盟齊侯于柯而二鄆之會不至此同盟于幽諸侯皆在而魯猶以微者行是以有公子結之盟三國西鄙之伐

汪氏曰說者皆疑鄭詹逃來在明年不當先諱公而

貶之夫春秋為國諱惡苟不書鄭詹之來則失事實
書詹來而盟幽不諱公則又彰莊公之失信故沒公
不書使若微者同軟則莊公之罪不甚顯而所以譏
之者至矣況聖人筆削一經屬辭比事以寓賞罰必
詳上下文及前後事而後識其指歸安可謂不當先
諱公乎公子翬未弑隱公而去其族齊無知未弑襄
公而弟年書名紀叔姬全節守義以妾媵而特書歸
于紀季子賢而不書出奔皆所以詳本末而垂法戒

非可以常例議之也朱子于綱目書魏荀攸書司空
梁文惠公狄仁傑漢未為魏而言魏仁傑未贈司空
而稱司空亦先事而致褒貶豈非取法春秋之遺意
乎按汪氏說亦有意然幽盟無公實是脫文

春秋有特盟參盟同盟特參二字見于左傳說經者
之支也齊桓主伯四十餘年莊十六年二十七年二
幽之盟書同其餘皆不言同蓋同者為不同而言也
葵丘盛時不須言同矣晉文藉桓之餘人心未解伯

靈不歇踐土翟泉二盟不言同齊氏曰經書同盟者
十有六幽幽新城清丘斷道蟲牢馬陵蒲戚柯陵虛
打鷄澤戲亳城北重丘平丘其載辭若曰同救災患
同恤禍亂同獎王室同討不服皆天下之辭所謂公
言之也其不書同者若垂隴若澶淵若祝柯若溴梁
若臯鮑或以復仇或以平怨或專自大夫或志于黷
貨或宋楚主盟或兩國特相盟或侯伯不與盟皆一
國之辭所謂私言之也若夫天下之辭公言之而不

書同者首止甯毋洮葵丘牡丘踐土翟泉七盟是也
七盟皆桓文之盛而春秋不書同又有以見天下之
一乎齊晉也故以十六盟視一時之不同者則同盟
為愈以首止葵丘踐土七盟視他年之同盟者則不
同為盛蓋以其有不同者然後書同以別之既曰無
不同矣夫又何書同之有

杜氏曰陳國小每盟會皆在衛下齊桓始霸楚亦始
強陳侯介於二大國之間而為三恪之客故齊桓因

而進之遂班衛上矣夫自莊十五至僖凡三十五年
八會陳在衛上者非杜氏之說也陳之在衛下者人
也侯在衛下者止桓十六年四月耳別有說

滑今河南偃師縣南二十里有古滑國與公次之滑
不同幽宋地公作公會許男下公穀有曹伯

此書同盟之始

邾子克卒

左傳王使虢公命晉曲沃伯以一軍為諸侯郝仲與

曰曲沃篡晉而王命獎亂故諱不書齊桓晉文受命
為侯伯亦不書即此意

甲辰○僖王五年崩

十有七年○齊桓九晉武三十九卒衛惠二十三蔡哀
十八鄭厲二十四曹莊二十五陳宣十六杞共四宋
桓五秦德公元年楚文十三

春齊人執鄭詹

左氏鄭不朝也蓋追討前日事也鄭既侵宋又不朝

齊鄭詹自難免執第去年冬鄭方同盟幽朝與不朝
尚未可知豈有春時便責其不朝而執其大臣乎意
鄭雖同盟心未誠服詹為謀國必有二心齊故執之
所以討舊惡而攝邪心也此與召陵之後討陳同公
穀佞人之來既無足據左氏不朝之說亦為未詳

夏齊人殲于遂

穀梁傳齊人滅遂使人戍之遂之因氏飲戍者酒而
殺之齊人殲焉

蘓子繇曰齊人弑遂而戍之不戒遂因氏頌氏工婁氏須遂氏嚮齊戍醉而殺之書齊人殲于遂自取之也春秋之書敗亡其自取者三齊人殲於遂梁亡王師敗績於茅戎以為其所以自處者固敗亡之道而非敵之罪也

殲公作瀝

秋鄭詹自齊逃來

鄭方朝而執詹以未形之叛於理不順齊無以解手

故逸詹使逃此齊之為謀也或以逃罪詹受逃罪魯者皆不知當時事實故

詹公作瞻

冬多麋

乙巳○惠王元年

十有八年○齊桓十晉獻公侂諸元年衛惠二十四蔡哀十九鄭厲二十五曹莊二十六陳宣十七杞共五宋桓六秦德二楚文十四○周僖王十七年崩孫惠

王十八年立

春王正月日有食之

夏公追戎于濟西

熊過氏曰濟西近魯戎在其南而鄰魯追而舉時日久之辭也自是而後魯伐戎終不能為魯患公羊子大其不使戎邇於我是矣

春秋無費辭言追戎則戎來可知左氏以為諱之非也

秋有蠶

孔氏曰洪範傳云蠶如蠶三足生於南越南越婦人多淫故其地多蠶淫女蠶亂之所生也陸璣詩疏云一名射景在淮水中人在岸上景見水中投人景則殺之或謂含沙射人入皮肌其瘡如疥徧身瀉瀉或或故為災

冬十月

丙午○惠王二年

十有九年○齊桓十一晉獻二衛惠二十五蔡哀二十
鄭厲二十六曹莊二十七陳宣十八杞共六宋桓七
秦宣公元年楚文十五卒

春王正月

夏四月

秋公子結媵陳人之婦于鄆遂及齊侯宋公盟

鄆衛之東地知媵為衛女也大夫家無媵女之事知
陳人為陳君也魯受鄭詹之逃齊人不悅聞齊宋適

在于鄆自當往聽即無受逃之事而伯主在前外臣
邇遁亦安能不執鞭弭一從伯令也公子結往盟無
益於魯則可有害于魯則不可况主盟在齊許則盟
不許則不盟結又豈敢自必哉灌甫曰遂事善且不
可况以大夫而盟諸侯乎是年冬三國伐我西鄙盖
有以致之也過矣鄭詹之逃齊桓何以伐魯逸逃者
其心也如不伐魯非所以為令也故不得不伐

王元馭曰結以媵往事至微也何緣遂與霸主為盟

哉公羊傳云大夫出境有可以安社稷利國家者專之可也啖氏亦謂結為魯設免難之策為齊畫講好之計是以春秋善結也若然則齊宋陳何以冬即來伐或又以為三國伐魯以結不奉君命而專之故若然則齊桓公何不當其會時叱而絕之而既與之盟矣旋即背盟而來伐安在其霸主哉愚以為必有所謂而史失之朱子所謂春秋自有無定當處蓋正指此類耳

董仲舒氏曰春秋固有常義又有應變無遂事者謂平生安寧也專之可也者謂救危除患也進退在大夫者率用兵也徐行不及者謂不以親害尊不以私妨公也故公子結受命往媵陳人之婦於鄆遂其事從齊桓盟春秋弗以為救莊公之危公子遂命使京師遂生事之晉春秋非之以為是時僖公安寧無危而救有危而不專救謂之不忠無危而擅生事是卑君故此二臣俱生事春秋有是有非其義然也

夫人姜氏如莒

或謂姜氏知齊不悅魯欲結齊而悅莊不敢遽至於齊而適莒以伺之莒近齊之國也

冬齊人宋人陳人伐我西鄙

齊欲結魯而魯以前怨尚未決然且討受釐之罪二者不得不伐伐魯者求魯也熊過氏以為結盟欲緩師而公不從故卒見伐又以齊侯不能勤王而唯魯之求失所先後焉誤矣

此見伐之始

丁未○惠王三年

二十年○齊桓十二晉獻三衛惠二十六蔡穆侯肸元年鄭厲二十七曹莊二十八陳宣十九杞共七宋桓八秦宣二楚堵敖熊羆元年

春王二月

左傳鄭伯和王室不克執燕仲父

夫人姜氏如莒

汪氏曰文姜以桓三年至自齊至是蓋年六十矣淫
姣之行老而彌甚比歲如莒備書不削雖國惡不容
諱也唐武后年且八十多選美少年為奉宸內供奉
醜惡無恥不可勝紀朱子綱目于武曌將殂之際屢
書周以張易之為奉宸令周賜張昌宗爵鄴國公其
亦春秋志姜氏如莒之遺旨歟

夏齊大災

齊災何以書及我也且齊晉二伯宋陳三恪春秋固

謹書也

左傳夏鄭伯遂以王歸王處于櫟

秋七月

左傳王及鄭伯入於鄆遂入成周取其寶器而還

冬齊人伐戎

戎在徐州之域最近齊故先治之家氏曰周有子頹之亂齊桓為伯主若罔聞知鄭伯虢公胥命于弭以兵討亂殺子頹王入于王城齊亦不能預也齊桓之

失于為義也多矣此正論也然齊桓霸圖有漸整頓
家門先為營窟魯宋譚遂邾戎最為相近譚遂小國
則滅之以廣土宋魯大國則親之以連交戎未可遽
滅亦不當為好故伐以却之經營布置為根本計故
是時鄭伯殺子頽納天王寧周室此最美大之事齊
桓自度其力寧讓鄭伯為之而置不一問齊桓自謀
立國固如此

戎穀作我

戊申○惠王四年

二十有一年○齊桓十三晉獻四衛惠二十七蔡穆二
鄭厲二十八卒曹莊二十九陳宣二十杞共八宋桓
三楚堵敖二

春王正月

先是虢叔謂鄭伯曰盍納王乎至是左傳記春胥命
于弭夏同伐王城則胥命者相結言之意也

夏五月辛酉鄭伯突卒

左傳夏同伐王城鄭伯將王自圉門入虢叔自北門
入殺王子頹及五大夫王與之武公之畧自虎牢以
東

鄭伯之卒齊侯之幸也齊桓以鄭不朝執鄭詹四年
未討而鄭伯方執言仗義討賊納主齊桓曾無一介
之使以寧天王使鄭伯不卒必將挾天子以令齊侯
齊侯何辭以對故曰鄭伯之卒齊桓之幸也

秋七月戊戌夫人姜氏薨

冬十有二月葬鄭厲公

王氏曰據左氏鄭伯有納惠王之功勲在王室然不免謚為厲者其始以賂而篡立中以虐而出奔周室雖衰公議尚在臣子私謚不敢妄加美名古意猶可攷也

己酉○惠王五年

二十有二年○齊桓十四晉獻五衛惠二十八蔡穆三鄭文公捷元年曹莊三十陳宣二十一杞惠公元年

宋桓十秦宣四楚堵敖三

春王正月肆大眚

姜廷善曰書稱眚災肆赦眚過誤也大過誤當赦者也季氏曰以莊公幼年嗣位制于文姜羣臣不協其國人陷于大過誤者多矣至是文姜既沒于是肆赦大眚焉書蓋予之之辭第以為繇于齊今則未必然也

灌甫曰惠王以子頹之亂播遷于櫟去年春虢鄭納

王于王城以國未靖故為大眚以安反側之心耳則肆大眚為周王之事矣是也所謂以內辭書者歟

啖氏曰肆者放也眚者過也如今之赦爾公羊云忌省有何義乎謂縱釋有罪惡人幸免則所肆當云大罪何云大眚乎

眚公作省

癸丑葬我小君文姜

王樵氏曰周人以諱事神名終將諱之故易之以謚

末世滋濫謚不應實爰及婦人婦人無外行於禮當
繫夫之謚取其夫謚冠於姓之上詩稱莊姜宣姜共
姜春秋宋共姬即其義也婦人法無謚也生以夫國
冠之韓媿秦姬是也死以夫謚冠之莊姜定姒是也
末世別為作謚如景王未崩妻稱穆后皆非禮也魯
文姜弑逆淫亂之人得罪宗廟國人之所不容今不
誅而死縱以子母之故不忍棄絕葬之足矣又別為
之謚曰文而不復繫以桓公可乎自是魯國從而效

尤哀姜成風聲姜敬嬴齊姜穆姜齊歸皆別立謚不復繫于夫且妾母當之不正益甚矣

陳人殺其公子御寇

左氏載陳人殺其太子御寇則應書君殺世子今曰陳人殺公子則國亂無政衆人擅殺而不書於其君是矣若以君父討而當罪雖專殺無議也必殺之以非罪而後書今御寇書人以殺與討亂同文又公子完為其黨亦不書奔則是以亂討而非其罪者也杜

云陳氏惡殺太子之名故以國討公子告非也苟殺太子而赴以公子聖人安得不改正之耶考史陳宣欲立嬖姬子款國人黨邪助之是時宣公之志未形國人擅殺之迹甚著故不與晉申生宋痤一例

熊過氏曰左氏以御寇為太子則與晉申生宋痤同皆應直稱君殺世子者若他人殺之如陳公子招殺陳世子偃師則不言其實公子也則如陳人殺公子過亦不言其今陳人殺而曰其疑下有大夫之闕文

也是時陳從霸令數有會盟御寇貴卿從事意者國人不欲如蔡殺公子燮之類歟陳齊方睦而陳之貴卿見殺不聞齊人之見討也其為霸國亦未盡矣

張氏曰不稱世子未誓于天子也未誓則稱公子重王命也御寇乃君之適嗣為一國之儲貳而衆人得以殺之則其所以自處必有失其道者矣故劉氏譏御寇之為人子足以殺其身而春秋畧殺者之罪也左傳陳公子完與顓孫奔齊顓孫自齊來奔齊使敬

仲為工正

此書專殺之始

御公穀作禦

夏五月

春秋無事以首時稱者五十九惟此書五月昭十年書十二月不誤則有脫焉非孔子故存之也

秋七月丙申及齊高傒盟于防


此盟左傳無明文而公穀皆以為公是也莊公受制

于母必使待婚齊女喪中與大夫盟而求婚不書公諱喪時圖婚也若曰諱與大夫盟則諸侯固有盟者矣按公是年三十五歲或繼娶歟史不書歟不然未有國君而愆期若此也

冬公如齊納幣

納幣大夫之事也喪中納幣尤非也

汪氏曰漢惠帝制于呂氏立姊魯元公主女為后雖娶甥女而不顧與莊公事頗相類



春秋辯義卷六